

## EDITORIAL



FOTOS PIXABAY.COM

# Verd

DA RITA CATHOMAS-BEARTH

**«Verd». Avant paucs decennis era quai simplamain ina colur, en il meglier cas la colur da la speranza. Dentant è verd ina partida politica, ina tenuta e per tscherta glieud quasi ina religiun.**

Verd vul ins esser, perfin quels che sa distanzieschan dals verds. Er sche lezs postuleschan autos electricas cun electricitad ord implants da cogla.

Mes bab n'era betg verd. El era per construir il lai da la Greina e nizzegiar quai che la natira porscha. Quai era in cumond biblic: far la terra subdita. Ma el era tuttina pli verd che blers verds, perquai ch'ils temps eran auters ch'oz. L'auto duvrava el per lavurar. En il temp liber quasi mo per ir in pèr paucs kilometers

en Val Sumvitg en tegia. Là faschevan mes geniturs vacanzas. L'aviun han els strusch duvrà en lur vita e cun l'auto pli lunsch che Cuirà nun èn els mai ids. Quai n'era betg ina tenuta, mabain ina moda da viver usitada da quels onns.

Oz che tut stat liber e lartg a nus, che daners e temp èn avant maun, che tut ils ischs dal consum nun èn betg mo averts, mabain carmalan als pli dulstchs daletgs – oz èsi grev da resister e desister. Nua cumenzar? Na stuess betg il stadi cumandar e scumandar per che tuts stuessan far il medem? Daco duess gist jau desister da l'auto? Sche tuts fan quai va l'industria dad autos sutsura e las plazzas da lavur a la malura. E sch'jau na sgol betg? Sche tuts na mangian betg charn? In disaster, u betg?

Las midadas che fissan propri necessarias avessan immensas consequenzas sin nossa vita. Da quellas avain nus tuts tema e tema blochescha. Perquai succeda sin il pli quai che renda: energia solara, mulins da vent (er gnanc quels betg adina!), izolaziun da las chasas, novs indrizs da stgaudar. E tut quai dovra novas ressursas, materias primas, energia, producescha rument. La bilantscha ecologica è savens problematica. Quai ch'ins stuess atgnamain far è renunziar. Ma cun gliez pon ils pli paucs propri cumenzar. Nus essan tuts ambivalentes e malsegirs, er jau.

**Redactura responsabla.**

**PS: Quest è il dieschavel numer dals novs «accents» che cumparan dapi il fanadur 2017. Cun l'entschatta dal 2020 datti ina midada tar La Quotidiana. Schebain ils «accents» cuntinueschan, nun è il mument anc betg cler.**